

Na osnovu člana 13. Zakona o principima lokalne samouprave u Federaciji BiH („Službene novine Federacije BiH“, broj: 49/06 i 51/09) i člana 84. Statuta Općine Stari Grad Sarajevo („Službene novine Kantona Sarajevo“, broj: 20/24) na 38. redovnoj sjednici, održanoj dana \_\_\_\_\_ Općinsko vijeće Općine Stari Grad Sarajevo, donosi

**PRAVILNIK  
O STIPENDIRANJU UČENIKA I STUDENATA BEZ RODITELJSKOG STARANJA**

**I – OPĆE ODREDBE**

**Član 1.  
(Predmet Pravilnika)**

Pravilnikom o stipendiranju učenika i studenata bez roditeljskog staranja uređuju se opći uslovi, postupak i kriteriji dodjele stipendija učenicima osnovnih i srednjih škola, te redovnim studentima, državljanima Bosne i Hercegovine, sa prebivalištem na području Općine Stari Grad Sarajevo, najmanje godinu dana do dana prijavljivanja na javni poziv.

**Član 2.  
(Korisnici prava)**

Korisnici prava prema odredbama ovog Pravilnika su:

- redovni učenici osnovnih škola bez oba roditelja, odnosno bez roditeljskog staranja, starosti do 18 godina;
- redovni učenici srednjih škola bez oba roditelja, odnosno bez roditeljskog staranja, starosti do 22 godine;
- redovni studenti bez oba roditelja, odnosno bez roditeljskog staranja, starosti do 27 godina.

**Član 3.  
(Aplikant)**

(1) Aplikanti prema odredbama ovog Pravilnika su redovni učenici osnovnih škola/staratelji, redovni učenici srednjih škola/staratelji, te redovni studenti visokoškolskih ustanova.

## **II – OPĆI KRITERIJ ZA DODJELU FINANSIJSKIH SREDSTAVA ZA REDOVNE UČENIKE OSNOVNIH I SREDNJIH ŠKOLA TE REDOVNE STUDENTE BEZ RODITELJSKOG STARANJA**

### **Član 4. (Kriterij za dodjelu finansijskih sredstava)**

- (1) Kriterij za dodjelu finansijskih sredstava iz Budžeta Općine Stari Grad Sarajevo redovnim učenicima osnovnih i srednjih škola, te redovnim studentima, djeci bez oba roditelja, kao i djeci bez roditeljskog staranja, shodno odredbama ovog Pravilnika su sljedeći:
- da su državljani Bosne i Hercegovine;
  - da su stanovnici Općine Stari Grad Sarajevo u minimalnom trajanju od najmanje godinu dana;
  - da redovno pohađaju osnovnu/srednju školu;
  - da su redovni studenti visoko obrazovne institucije.

## **III - STIPENDIRANJE**

### **Član 5. (Odluka o raspodjeli finansijskih sredstava)**

Općinski načelnik nakon usvajanja Budžeta za tekuću godinu, a prije raspisivanja Javnog poziva za dodjelu stipendija učenicima i studentima bez roditeljskog staranja donosi Odluku kojom se utvrđuje ukupan iznos finansijskih sredstava koja se planiraju za stipendiranje shodno odredbama člana 2. ovog Pravilnika.

## **IV - SREDSTVA**

### **Član 6. (Iznos sredstava)**

- (1) Stipendije se dodjeljuju za tekuću školsku/akademsku godinu i isplaćuje se za 9 mjeseci u kojim se nastava odvija (septembar-decembar; februar-juni;).
- (2) Visina mjesečne stipendije za učenike i studente bez roditeljskog staranja iznosi:
- a) za učenike osnovnih škola - 100,00 KM;
  - b) za učenike srednjih škola - 150,00 KM;
  - c) za studente - 200,00 KM.
- (3) Općinski načelnik ima pravo da, u slučaju raspoloživih sredstava u Budžetu, tokom godine mijenja iznose utvrđene u stavu (2) ovog člana.

## V – JAVNI POZIV ZA DODJELU FINANSIJSKIH SREDSTAVA

### Član 7.

(Javni poziv)

- (1) Finansijska sredstva navedena u članu 6. ovog Pravilnika iz Budžeta Općine dodjeljuju sa isključivo putem Javnog poziva, koji raspisuje Općinski načelnik nakon usvajanja Budžeta za tekuću godinu.
- (2) Javni poziv iz stava (1) ovog člana se raspisuje najkasnije do 30.11. tekuće godine.
- (3) Javni poziv se objavljuje u jednom dnevnom listu i na web stranici Općine Stari Grad Sarajevo i ostaje otvoren 15 dana.
- (4) Javni poziv iz stava (1) ovog člana priprema i dostavlja Općinskom načelniku Služba za obrazovanje, kulturu, sport i mlade.

### Član 8.

(Sadržaj Javnog poziva)

- (1) Javni poziv obavezno sadrži:
  - Naziv organa koji raspisuje poziv;
  - Osnov ostvarivanja finansijskih sredstava;
  - Spisak dokumentacije koja se obavezno dostavlja uz prijavu;
  - Aplikaciju za prijavu na Javni poziv;
  - Rok za prijavu na javni poziv;
  - Iznos finansijskih sredstava, koja su predviđena za dodjelu stipendija po predmetnom javnom pozivu.

### Član 9.

(Dokumentacija za Javni poziv)

Uz popunjenu aplikaciju koja je sastavni dio Javnog poziva, za prijavu na isti, aplikant je obavezan dostaviti sljedeću dokumentaciju (originale ili ovjerene kopije) kako slijedi:

1. **Uvjerenje o državljanstvu ili Rodni list sa navedenom činjenicom o državljanstvu** aplikanta za stipendiju ne starije od šest mjeseci;
2. **Uvjerenje o kretanju aplikanta/staratelja za stipendiju ne starije od 30 dana** (MUP KS, PU Stari Grad);
3. **Potvrdu o upisu aplikanta u tekuću školsku/akademsku godinu**, izdatu od nadležne institucije škole/fakulteta sa naznakom da aplikant prvi put upisuje razred/godinu;
4. **Uvjerenje o postignutom uspjehu** aplikant (uvjerenje o završenom razredu) za stipendiju u prethodnoj školskoj/akademske godini (za učenike prvog razreda srednje škole **svjedočanstvo IX razreda** osnovne škole, za studente prve godine studija **svjedočanstvo završnog razreda srednje škole (IV razred)**, za studente viših godina **potvrda o prosjeku ocjena** za prethodnu godinu studija);
5. **Dokaz** o učešću i postignutim **rezultatima** na općinskom, kantonalmom, federalnom, državnom i međunarodnom takmičenju za prethodnu školsku/akademsku godinu, potvrda ili diploma od nadležnih institucija (resorno ministarstvo, strukovni savez...);
6. **Rješenje o smještaju aplikanta u hraniteljsku porodicu;**
7. **Uvjerenje o starateljstvu za aplikanta;**

8. **Izjava aplikanta kojom se daje saglasnost da se njegovi podaci mogu obrađivati u skladu sa Zakonom o zaštiti ličnih podataka, za maloljetne aplikante Izjavu daje roditelj/staratelj i ista treba biti ovjerena od strane nadležne općinske službe.**
9. **Potvrda o otvorenom računu za aplikanta.**

## **VI - KOMISIJA ZA POSTUPANJE PO APLIKACIJAMA**

### **Član 10. (Komisija)**

- (1) Općinski načelnik nakon usvajanja Budžeta za tekuću godinu, te donošenja Odluke iz člana 5., a prije raspisivanja Javnog poziva iz člana 7. ovog Pravilnika imenuje Komisiju za postupanje po aplikacijama na Javni poziv za dodjelu stipendija učenicima i studentima bez roditeljskog staranja.
- (2) Komisija se imenuje na period od raspisivanja Javnog poziva do okončanja procedure izbora aplikanta i broji: 5 (pet) članova, od kojih je jedan predsjednik Komisije. Komisiju čine 3 (tri) člana koji su državni službenici i 2 (dva) člana koji su predstavnici Općinskog vijeća Stari Grad Sarajevo.
- (3) Komisija ima zadatak da:
  - Pregleda sve aplikacije sa dostavljenom dokumentacijom;
  - Aplikacije uz koje nije dostavljena obavezna dokumentacija iz člana 9. ovog Pravilnika, odbacuje kao da nisu ni podnesene i o istom obavještava aplikanta pismenim putem;
  - Aplikacije koje ispunjavaju kriterije utvrđene ovim Pravilnikom, Komisija dostavlja Općinskom načelniku na odobravanje, uz prijedlog.

## **VII - KRITERIJI ZA DODJELU STIPENDIJA**

### **Član 11. (Dodatni kriteriji)**

- (1) Osnovni kriteriji za dodjelu stipendija je sadržan u članu 2. i 4. ovog Pravilnika, dok se dodatno bodovanje utvrđuje na osnovu rezultata, postignutih na takmičenjima na način kako slijedi:

Bodovi po osnovu rezultata u učenju:

- a) Za učenike osnovne škole prosječna ocjena u završnom razredu osnovne škole zaokružena na dvije decimale i pomnožena sa 9 (prosječna ocjena x 9) bodova;
- b) Za učenike srednjih škola prosječna ocjena u prethodnoj školskoj godini zaokružena na dvije decimale i pomnožena sa 10 (prosječna ocjena x 10) bodova;
- c) Za studente prosječna ocjena u prethodnoj akademskoj godini zaokružena na dvije decimale i pomnožena sa 12 (prosječna ocjena x 12);

(2) Po osnovu rezultata postignutih na takmičenjima:

Od 1. do 3. mjesta:

- a) općinsko takmičenje od 1 do 3 boda;
- b) kantonalno takmičenje od 3 do 5 bodova;
- c) federalno takmičenje od 6 do 8 bodova;
- d) državno takmičenje od 9 do 11 bodova;
- e) međunarodno takmičenje od 13 do 15 bodova.

(3) Za učešće na takmičenjima:

- a) kantonalno takmičenje 1 bod,
- b) federalno takmičenje 2 boda,
- c) državno takmičenje 3 boda,
- d) međunarodno takmičenje 4 boda.

(4) Osvojeno mjesto, isključuje bodove po osnovu učešća.

#### **Član 12. (Prednost)**

Ukoliko prijavljeni aplikanti imaju jednak broj bodova, prednost će imati onaj aplikant koji ima više bodova po osnovu rezultata u učenju.

#### **Član 13. (Obavijest)**

- (1) Svaki učesnik u javnom pozivu mora biti pismeno obaviješten o rezultatima izbora najkasnije u roku od 30 dana od dana izbora, tačnije objavljivanja preliminarne liste aplikanata-korisnika općinske stipendije za djecu bez roditeljskog staranja.
- (2) Nezadovoljni učesnik u javnom pozivu može podnijeti prigovor za zaštitu svojih prava Drugostepenoj stručnoj komisiji Općinskog vijeća u roku od 8 dana od prijema obavještenja.
- (3) Odluka Drugostepene komisije Općinskog vijeća je konačna.

### **VIII – ODLUKA O DODJELI FINANSIJSKIH SREDSTAVA**

#### **Član 14. (Dodjela finansijskih sredstava)**

- (1) Općinsko vijeće na osnovu prijedloga Komisije iz člana 10. ovog Pravilnika donosi Odluku o dodjeli stipendija učenicima i studentima bez oba roditelja, odnosno bez roditeljskog staranja kojom odobrava dodjelu stipendija aplikantima u skladu s članom 5. ovog Pravilnika.
- (2) Ukoliko aplikant dobije stipendiju od nekog drugog fonda ili institucije, po istom osnovu gubi pravo na stipendiju po osnovu odredbama ovog Pravilnika, s tim da sljedeći aplikant sa bodovne liste dobiva općinsku stipendiju.

**Član 15.**  
**(Ugovor)**

- (1) Na osnovu Odluke Općinskog vijeća, sa izabranim aplikantima zaključuje se ugovor o dodjeli stipendije kojim se regulišu međusobna prava i obaveze učenika/studenta i Općine Stari Grad Sarajevo.
- (2) Ugovor potpisuje učenik/student, njegov roditelj/staratelj i Općinski načelnik u ime Općine Stari Grad Sarajevo.
- (3) Pravo na stipendiju po ovom Pravilniku može ostvariti jedan ili više učenika/studenta istog domaćinstva.

**Član 16.**  
**(Obustava stipendije)**

- (1) Pravo Općinskog načelnika je da obustavi isplatu stipendije učeniku/studentu u koliko:
  - a) napusti redovno školovanje;
  - b) izgubi pravo na dalje školovanje iz neopravdanih razloga;
  - c) se utvrdi da prima stipendiju po istom osnovu;
  - d) promjeni adresu stanovanja.
- (2) U slučajevima predviđenim u stavu (1) ovog člana, potpisnik Ugovora o stipendiranju dužan je da vrati sav iznos sredstava Općini Stari Grad Sarajevo, najkasnije do kraja tekuće školske/akademske godine za koju je primio stipendiju po osnovu ovog Pravilnika.

**IX – PRELAZNE I ZAVRŠNE ODREDBE**

**Član 17.**  
**(Stupanje na snagu Pravilnika)**

Ovaj Pravilnik stupa na snagu osmog dana od dana objave u „Službenim novinama Kantona Sarajevo“.

**PREDSJEDAVAJUĆI**  
**OPĆINSKOG VIJEĆA STARI GRAD**  
**SARAJEVO**

**Seid Škaljić**

Broj: 02-45-\_\_\_\_/24  
Sarajevo, juni 2024. Godine

## OBRAZLOŽENJE

Pravni osnov za donošenje Pravilnika o stipendiranju učenika i studenata bez roditeljskog staranja sadržan je u preambuli akta. Uvidjevši da se broj djece bez roditeljskog staranja na području Općine Stari Grad Sarajevo povećava, Općinski načelnik u saradnji sa općinskim službama i općinskim vijećnicima Općine Stari Grad Sarajevo želi na ovaj način pomoći i olakšati stanovnicima Općine koje se susreću sa ovim životnim iskušenjima.

U skladu s naprijed navedenim Pravilnikom o ostvarivanju prava na ovaj vid stipendiranja stanovnika Općine Stari Grad Sarajevo, utvrđeni su jasni kriteriji za ostvarivanje prava na dodjelu stipendija za učenike i studente bez roditeljskog staranja, redovne učenike osnovnih škola bez oba roditelja, odnosno bez roditeljskog staranja.

Ovim Pravilnikom regulisano je stipendiranje učenika i studenata bez roditeljskog staranja i kontrola izdvajanja sredstava iz Budžeta Općine Stari Grad Sarajevo.

Shodno takvim opredjeljenjima, određeno je da Služba za obrazovanje, kulturu, sport i mlade u utvrđenom roku pripremi prijedlog naprijed pomenutog Pravilnika.

Pravilnikom je predviđeno ukupno 9 (devet) poglavlja, na način kako slijedi:

- I- Opće odredbe;
- II- Opći kriteriji za dodjelu finansijskih sredstava za redovne učenike srednjih škola i redovne studente visokoškolskih ustanova;
- III- Stipendiranje;
- IV- Sredstva;
- V- Javni poziv za dodjelu finansijskih sredstava;
- VI- Komisija za postupanje po aplikacijama;
- VII- Kriteriji za dodjelu stipendija;
- VIII- Odluka o dodjeli finansijskih sredstava;
- IX- Prelazne i završne odredbe.

Finansijska sredstva za ove namjene planirana su u Budžetu Općine Stari Grad Sarajevo za 2024. godinu.

### **Predlagač:**

Općinski načelnik

Putem Službe za obrazovanje, kulturu, sport i mlade